



Jumat, 8 Oktober 2021

Ogen: Eskiell 17:11-21



La lit Dalam Pulah



Pemberontak, sada penggelaren man kalak si la setia, si nilah i bas padan si enggo ibelasken. Biasana kalak berontak erkiteken lit akapna si la payo nandangi padan e, lit tempa akapna ia irugiken, entah tertekan akapna arah ndalanken padan e, tempa lanai lit kebebasenna, banci ka lit akapna gegeh ras kengasupenna si sada entah enggo lit penundalenna si deban i bas ndalani kegeluhenna, lanai ia perlu temanna si erpadan ndube.

Bangsa Israel ikataken Tuhan bangsa pemberontak. Sabap, tupung keluarga raja itaban ku Babil, ibuat raja Nebukadneser sekalak anak raja Israel lako erpadan ras ia. Isuruh Nebukadneser anak raja e ersumpah maka tetap patuh man bana. Ibuat Raja Babil e pe piga-piga kalak si erpangkat meganjang, ibahanna jadi tabanen. Perpadanen e iakap kalak Israel ngerugiken ia, si erbahansa ia tertekan. E maka Raja Juda muat keputusan lako berontak. Lanai icikepna padan si enggo ibelaskenna man Raja babil. Kiam ia ndahi raja Mesir, e bahanna penundalenna, akapna adi ku je ia ndatken serpang puluh. Asa pengidahna gegehen bangsa Mesir asangken bangsa Babil.

Lit kin dalan puluh man kalak pembrontak? Nina Tuhan, uga kal pe iayak-ayak kalak Babil nge raja Juda e, ras uga kal pe ibunuhna, sabap la ia setia. Tentara Mesir si megegeh e pe labo ngasup mulahi ia, kerina kalak e pe kernep ibahan tentara Babil. Nina Tuhan, Aku pe labo sinik nandangi bangsa pemberontak e. Ku dabuhkan ukumen tole nari man bana alu njadikan bangsa e jadi tawanen Babil.

Bas manusia pe adi la setia, lit ukumenna apai ka bas Tuhan. Kekelengen si enggo isehkenNa man banta adi la si ergaken, nilah kita bas IA nari, si darami ka penampat si deban, uga kal pe la lit dalanta puluh.